

# 《佛說亨經抄》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 17, No. 790

## No. 790

### 佛說亨經抄

吳月支國居士支謙譯

聞如是。一時佛在舍衛國。太子名祇。有園田八十頃。去城不遠。其地平正。多眾果樹。處處皆有流泉浴池。其池清淨。無有蚊蜂蚊虻蠅蚤。居士須達。身奉事佛。受持五戒。不殺不盜不婬不欺不飲酒。見諦溝港。常好布施。賑救貧窮。人呼為給孤獨氏。須達欲為佛起精舍。周遍行地。唯祇園好。因從請買。太子祇言。能以黃金布地。令間無空者。便持相與。須達曰諾。聽隨買數。祇曰我戲言耳。訟之紛紛。國老諫曰。已許價決。不宜復悔。遂聽與之。須達默念何藏金足。祇謂其悔嫌貴自止。曰不貴也。自念當出何藏金耳。即時使人象負金出。隨集布地。須臾滿四十頃。祇感念佛必有大道故使斯人輕寶乃爾。教齊是止。勿復出金。園地屬卿。我自欲以樹木獻佛。因相可這便立精舍已。各上佛。佛與千二百五十沙門。俱止其中。是故名祇樹給孤獨園也。

其王名卑先匿。舉宮中及人民。皆共事佛。奉諸沙門。衣食床臥疾藥所宜。世無佛時諸道皆興。譬如昏夜炬燭為明。天下有佛。眾邪皆歇。喻若日出火無復光。國中本共。事五百異道人。異道眾邪。是時皆廢。諸異道人。乃共嫉妬。謀欲毀佛以望敬事。其女弟子名酸陀利曰。師莫愁也。我能令人不復敬佛。事師如故。便從今始。欲日日莊嚴往來佛邊諸沙門所。至一月後。可默殺我埋祇樹間。佯行求索。眾人當言。數見此女往來精舍。即詣王告。乞吏搜索。啼哭出尸。道其婬亂無戒行意。國人聞是。必當捨佛來事諸師。諸師曰善。女如其言。往來一月。師使四人共殺埋之。分布求已。詣闕告言。生亡一女。眾人悉見。日日往來諸沙門所。乞吏搜求。王即勅外部吏。與行諸師。乃佯徘徊再三過。出尸輿載。遍行啼哭曰。沙門之法。戒當清淨。反婬人婦。恐事發覺。殺而藏之。有何道哉。國人聞此。多有信者。惟得道之人。知諂偽耳。

佛於是乃勅諸沙門。且勿入城。七日之後。事情當露。至八日旦。佛使阿難。巷至說曰。妄語讒人。天令口臭。詐誣清白。死入地獄。癡虐自怨。長夜受苦。國人聞是語。皆相謂曰。沙門必清淨。故佛說此語耳。王使人微密伺之。見異道家。竊相勞賀。共賜四人。異道人法。知經多者得分多。一人頑闇。得分獨少。怒曰當反汝事自共殺人。而詐誣佛。反與我少。伺人得之。牽將上聞。到以實對。即收謀者。王與群臣。俱出詣佛。給孤獨氏。諸清信士。及國人民無數。皆行詣佛。到已作禮畢。各一

面坐。王叉手白佛言聞此謗。莫不罔然。唯佛至真。清淨無量。不識其故。何緣有此。佛告王曰。誹謗之生。皆由貪嫉。而此久有。非這今也。王曰願欲聞之。佛言我宿命無數世時。我為菩薩道。常行慈心。欲度脫萬姓。時有菰隣奈國。廣博嚴好。人民熾盛。中有梵志。姓瞿曇氏。才明高遠。國中第一。有三子。其小子者。端正無比。父甚奇之。為設大會。請諸道人。中外親戚。抱兒示之。眾師相曰。是兒好道。有聖人相。必為國師。因名為李。李幼好學。才藝過人。悉通眾經。及天下道術九十六種。死生所趣。山崩地動。災異禍福。醫方鎮厭。無所不知。能却姪心。消伏蟲道。武略備有。而性慈仁。瞿曇沒後。二兄嫉之。數求分異曰。李幼好學。事師消費。與分當少。母憐念之。數曉二子。二子不止。李見兄意盛。自念人生。皆為貪苦。我若不去者。兄終不息。因自報母。求行學道。母便聽之。李即去近。明師作沙門。於山中自得四意止。一慈眾生。如母愛子。二悲世間。欲令解脫。三解道意。心常歡喜。四為能護一切不犯。復得四意。諸佛所譽。一制貪姪二除恚。怒三去癡念。四得樂不喜逢苦不憂。又絕五欲。目不貪色。耳不貪聲。鼻不貪香。舌不貪味。身不貪細滑能以智慧方便之道。順化天下。使行十善。孝順父母。敬事師長。諸疑惑者。令信道德。知死有生。作善獲福。為惡受殃。行道得道。見憂厄者為解免之。疾病者為施醫藥。服李教者。死皆生天。其有郡國水旱災異。李至即平。毒害悉除。

時有大國。安樂饒人。王名藍達。所任四臣。專行邪諂。姪盜奸欺。侵奪無厭。民被其毒。王不覺知。李愍傷之。往到城外。從道人沙陀。寄止七日。乃入城欲乞食。王於觀上。見李年少。儀容端政。行步有異。心甚愛敬。即出問訊。王曰。願道人留意。我有精舍近在城外。可於中止。當給所須。李曰諾。王喜曰。意欲相屈。明日已去。日日於宮食。李曰善。王還向夫人說。李非恒人。汝明日當見之。夫人心喜。床下有犬。犬名寶祇。聞之亦喜。明旦李來入宮。王與夫人迎為作禮。與施金床。攬毳毼。李欲就坐。犬前舐足。王自起行澡水。敬意奉食。已而俱出。到外精舍。李為王說治國政法。王大喜歡因請李留。令與四臣共治國事。四臣愚怯。不習戰陣。自知貪濁。常恐王聞。一臣曰人死神滅。不復更生。一臣曰貧富苦樂。皆天所為。一臣曰作善無福為惡無殃。一臣自恃知占星宿。然皆佞諂。不為忠政。李性聰明。高才勇健。仁義恭敬。信順寡言。言常含笑。不傷人意。清淨無欲。節色少事。其政不煩。豫知災異。能役使鬼神。却起死人。愛民如子。教之以道。不得訕謗。遊獵畋漁。彈射鳥獸。殺盜姪欺。讒罵佞嫉。諍怒妖疑。皆化使善。其為政後。國界安寧。風雨時節。五穀豐熟。眾官承法。不復擾民。索體無為。獨貴奉佛。沙門四道。朝暮誦習。及其姊子。亦賢有志。常師仰李。國好學者。多依附之。王無復憂。一以委李。四臣畏忌。不得縱橫興嫉妬意。謀欲治李。共合財寶人一億數。伺王出時。以上夫人。而自陳曰。臣等至意奉家所有。及身妻子。當為奴婢。欲白一事。願蒙聽省。夫人貪得受其好寶。答謝四臣曰。便說之。四臣對曰。王所奉李。被服麤陋。似乞人耳。見住過重。不念國恩。日導夫人惡教。王遠房室。竊念夫人。宜及少壯。當有立子。念若

失時。則絕國嗣。願熟思惟。不除李者。恐後有悔。夫人恚曰。王信此人。不知其惡。各且還歸。今自憂之。比令明日使不見李也。夫人遣四臣出。即以梔子黃面亂頭却臥。須臾王還。內妓白王。夫人不樂。王素重之。入問再三。夫人不應。王即怒曰。何人有罪。應誅戮者。汝欲使我罪誰那爾。夫人垂泣曰。王會不用我言耳。王曰便說。不違汝也。夫人即白。王且這出。李來謂我。今王老耄。不能聽政。國中吏民。皆伏從我。可以圖之共此樂也。今反為此乞人所謀。故我愁耳。王聞是語。譬若人噎。既不能咽。亦不得吐。不用恐悔。用之恐亂。念李助我。已十二年。常以忠政。憂國除患。遠近賴之。此國之寶。不可治也。王曰今治李者。後必大亂。為萬民故。且共忍之。夫人便自擲床下。舉聲哭曰。不治李者。我當自刺。自投樓下。不能見也。王復曉曰。汝亦知法。此非小事。起共議之。夫人還坐。王曰。道人之法。不可以刀杖加之。當以漸遣。稍減其養。明日來者。勿復作禮。擎捲而已與施木床於殿下坐。炊惡廝米。盛以瓦器。如是慚愧。極自當去。王說此時。竇祇不悅。夫人明旦。即以王教。具勅內厨。李來入宮。竇祇於床下。嚙喋吠之。李見狗吠。夫人擎捲。及所施設。即知有謀。自念我欲無害於人。人反害我。如是當避入深山耳。小怨成大。不可輕也。彼以陰謀我宜慎之。凡人身羸行正為強。今我自有食鉢水瓶革蓆繖蓋漉水之囊。斯足用矣。李食已攝物欲去。王驚起曰。是何疾也。顧謂夫人。乃使我失聖人之意。即前牽李。問欲何之。李答曰。為王治國。十二年矣。未曾見竇祇嚙喋如今也。是必有謀。故欲去耳。王曰竇有。今見李意。覺微甚明。願自勅厲。當誅惡人。不須去也。李曰。王前意厚。而今已薄。及我無過。宜以時去。夫盛有衰。合會有離。善惡無常。禍福自追。結友不固。不可與親。親而不節。久必泄瀆。如取泉水。掘深則濁。近賢成智。習愚益惑。數見生慢。踈則成怨。善友接者。往來以時。親如有敬。久而益厚。不善友者。假求不副。巧言利辭。苟合無信。接我以禮。當以敬報。待我以慢。當即遠避。有相親愛。迴相憎者。愛時可附。憎不可近。敬以親善。戒以遠惡。善惡無別。非安之道。人無過失。不可妄侵。惡人事已不可納。前人欲踈已不可強親。恩愛已離。不可追思。鳥宿枝折。知更求栖。去就有宜。何必守常。朽枝不可攀。亂意不可犯。人欲相惡。相見不懽。唱而不和。可知為薄。人欲相善。緩急相赴。言以忠告。可知為厚。善者不親。惡者不踈。先敬後慢。賢愚不別。不去何須。夫人初拜。今但擎捲。若我不去。將見罵逐。初施金座。今設木床。初盛寶器。今用瓦甌。初飯粳糧。今惡廝米。我不去者。且飯委地。知識相遇。主人視之。一宿如金。再宿如銀。三宿如銅。證現如此。不去何待。王曰。國豐民寧。李之力也。今棄去者。後將荒壤。李曰。天下有四自壞。樹繁花果。還折其枝。虺蛇含毒。反賊其軀。輔相不賢害及國家。人為不善。死入地獄。是為四自壞。經曰

惡從心生      反以自賊      如鐵生垢  
消毀其形

王曰。國無良輔。實須恃李。若欲相委。是必危殆。李曰。凡人有四自危。保任他家。為人證佐。媒嫁人妻。聽用邪言。是為四自危。經曰

愚人作行 為身招患 快心放意  
後致重殃

王曰。我師友李。常在不輕。當原不及。莫相捐去。李曰。友有四品。不可不知。有友如花。有友如稱。有友如山。有友如地。何謂如花。好時插頭。萎時捐之。見富貴附。貧賤則棄。是花友也。何謂如稱。物重頭低。物輕則仰。有與則敬。無與則慢。是稱友也。何謂如山。譬如金山。鳥獸集之。毛羽蒙光。貴能榮人。富樂同歡。是山友也。何謂如地。百穀財寶。一切仰之。施給養護。恩厚不薄。是地友也。王曰。今我自知。志思淺薄。聽用邪言。使李去也。李曰。明者有四不用邪偽之友。佞諂之臣。妖嬖之妻。不孝之子。是為四不用。經曰

邪友壞人 佞臣亂朝 嬖婦破家  
惡子危親

王曰。相與愛厚。宜念舊好。不可孤棄也。李曰。有十事知愛厚。遠別不忘。相見喜歡。美味相呼。過言忍之。聞善加歡。見惡忠諫。難為能為。不相傳私。急事為解。貧賤不棄。是為十愛厚。經曰

化惡從善 切磋以法 忠正誨勵  
義合友道

王曰。四臣之惡。乃使李患。不復喜我。李曰。有八事知不相喜。相見色變。眄眦邪視。與語不應。說是言非。聞衰快之。聞盛不喜。毀人之善。成人之惡。是為八事。經曰

平鬪殺人 尚有可原 懷毒陰謀  
是意難親

王曰。是我頑弊。不別明闇。惡人所誤。遂失聖意。李曰。有十事知人為明別賢愚。識貴賤。知貧富。適難易。明廢立。審所任。入國知俗。窮知所歸。博聞多識。達於宿命。是為十事。經曰

緩急別友 戰鬪見勇 論議知明  
穀貴識仁

王曰。自我得李。中外帖安。今日相捨。永無所恃。李曰。有八事可以帖安。得父財。有善業。所學成。友賢善。婦貞良。子孝慈。奴婢順。能遠惡。是為八事。經曰

生而有財 得友賢快 諸惡無犯  
有福祐快

王曰。聖人之言。誠無不快。李曰有八事快。與賢從事。得諮聖人。性體仁和。事業日新。忿能自禁。慮能防患。道法相親。友不相欺。是為八事。經曰

有佛興快      演經道快      眾聚和快  
和則常安

王曰。李常易諫。今何難留。李曰。有十不諫慳貪。好色。朦朧。急暴。抵突。疲極。憍恣。喜鬪專愚。小人。是為十。經曰

法語專愚      如與聾談      難化之人  
不可諫曉

王曰。如我憍恣。不能遠色。李得無為。不復與我語乎。李曰。人不與語有十事。傲慢。魯鈍。憂怖。喜預。羞慚。吃叨。仇恨。凍餓。事務。禪思。是為十事。經曰

能行說之可      不能勿空語  
虛偽無誠信      明哲所不顧

王曰。惡婦美姿。巧於辭令。如有外姝。卒何用知李曰。有十事可卒知。頭亂髻傾。色變流汗。高聲言笑。視瞻不端。受彼寶飾。闕看垣牆。坐不安所。數至隣里。好出野遊。喜通姪女。是為十事。經曰

婦女難信      利口惑人      是以高士  
遠而不親

王曰。人情所近。親信婦人。不知其惡。李曰。人有十事不可親信。主君所厚。婦人所親。怙身強健。恃有財產。大水漬處。故屋危牆。蛟龍所居。辜較縣官。宿惡之人。毒害之虫。是為十。經曰

謂酒不醉      謂醉不亂      君厚婦愛  
皆難保信

王曰。如李所語。愛習生惡。是可嫉也。李曰。可嫉有五。僇口傷人。讒賊喜鬪。焦曉不媚。嫉妬呪詛。兩舌面欺。是為五。經曰

施勞於人      而欲蒙祐      殃及其軀  
自遘廣怨

王曰。何所施行人所愛敬。李曰。愛敬有五。柔和能忍。謹而有信。敏而少口。言行相副。交久益厚。是為五。經曰

知愛身者      慎護所守      志尚高遠  
學正不昧

王曰。何者為人所慢李曰。見慢有五。鬢長而慢。衣服不淨。空無志思。姪態無禮。調戲不節。是為五。經曰

攝意從正      如馬調御      無憍慢習  
天人所敬

王曰。願李留意。共還精舍。李曰有十。不延於堂惡師邪友。蔑聖反論。姪妖嗜酒。急弊長者。無反復子。婦女不節。婢妾莊飾。是為十。經曰

遠避惡人      姪荒勿友      從事賢者  
以成明德

王曰。李在我樂四方無事。今日去者。國中必嗟。李曰。有八事可以安樂。順事師長。率民以孝。謙虛下下。仁和其性。救危赴急。恕己愛人。薄賦節用。赦恨念舊。是為八事。經曰

修諸德本      慮而後行      唯濟人命  
終身安樂

王曰。吾常念李。豈有忘時。李曰智者。有十二。念雞鳴。念悔過作福早起。念拜親禮尊臨事。念當備豫所止。念避危害言語。念當至誠見過。念以忠告貧者。念哀給護有財。念行布施飲食。念以時節食人。念以平均御眾。念用恩賜軍具。念時繕治。是為十二。經曰

修治所務      慮其備豫      事業日新  
終不失時

王曰。安得大賢。使留李乎。李曰。大賢有十行學聞高遠。不犯經戒。敬佛三寶。受善不忘。制慾怒癡。習四等心。好行恩德。不擾眾生。能化不義。善惡不亂。是為十行。經曰

明人難值      而不比有      其所生處  
族親蒙慶

王曰。我過重矣。畜養惡人。使李恚去。李曰大惡。有十五。好殺。劫盜。姪妖。詐欺。諂諛。虛飾。佞讒。誣善。貪濁。放恣。酗釁。妬賢。毀道。害聖。不計殃罪。是為十五。經曰

奸虐饕餮      怨譖良人      行己不正  
死墮惡道

王曰。曉李不止。使我慚愧。李曰。有十可愧。君不曉政。臣子無禮。受恩不報。過不能改。兩夫一妻。未嫁懷妊。習不成就。如人杖兵仗不能戰鬪。慳人觀布施。奴婢不能使。是為十。經曰

世儻有人      能知慚愧      是易誘進  
如策良馬

王曰。吾始念曰。知有道者。為難屈也。李曰。有十二難。任使專愚難。怯弱御勇難。仇恨共會難。寡聞論議難。貧窮負債難。軍無師將難。事君終身難。學道不信難。惡望生天難。生值佛時難。得聞佛法難。受行成就難。是為十二。經曰

人命難得 值佛時難 法難得聞  
聞能行難

王曰。今與李談。益我有智。李曰。略說其要。人所當知有四十五事。修其室宅。和其家內。親於九族。信於朋友。學從明師。事必成好。才高智遠。宜守以善。富貴行恩。治產宜慎。有財當廣方業。子幼勿付財。相善與交。苟合莫信。財在縣官。當早憂出。賣買交易。以誠勿欺。凡所投止。必先行視。所往當知貴賤。入國當親善人。客宜依豪。無與強諍。故富可求復。素貧勿大望。寶物莫示人。匿事莫語婦。為君當敬賢。厚勇取忠信。清者可治國。趣事能立功。教化之紀。孝順為本。師徒之義。貴和以敬。欲多弟子。當務義誨。為醫當有效驗。術淺不宜施用。病瘦當隨醫教。飲食取節。便身知識美食當共。博戲莫財。命抵所施。假貸當手自付證佐。從正勿枉。無過諫怒。以順避惡。以忍人無貴賤。性和為好。道以守戒。清淨為上。天下大道。無過泥洹。泥洹道者。無生老病死。飢渴寒熱。不畏水火。怨家盜賊。亦無恩愛。貪欲眾惡。憂患悉滅。故曰滅度。王當自愛。我今欲退

王曰。李欲去者。寧復有異誠乎。李曰。譬如大水所蕩突處。雖百歲後。不當於中立城郭也。其水必復順故而來。宿惡之人。雖欲行善。故不當信。本心未滅。或復為非。不可不戒。人所欲為。譬如穿池。鑿之不止。必得泉水。事皆有漸。智者見微。能濟其命。如人健泐截流度也

王曰。前後所說。我皆貫心。舉國士女靡不歡喜。舊惡低伏無敢言者。願聞其言。儻遭異人。何知其明。李曰。明者問對。種種別異。言無不善。師法本正。以此知之。明人之性。仁柔謹懿。溫雅智博。眾善所仰。無有疑也。觀其言行。心口相應。省其坐起。動靜不妄。察其出處。被服施為。可足知之。與明智談。宜得其意。得其意難。如把刃持。毒不可不慎也。王曰。欲事明者。不失其意。為之奈何。李曰。敬而勿輕。聞受必行。明者識真。體道無為。知來今往古。一歸空無。人物如化。少壯有老。強健則衰。生者必死。富貴無常。是故安當念危。盛存無常。善者加愛。不善黜遠。雖有仇恨。不為施惡。柔而難犯。弱而難勝。明人如是。不可慢也

王曰。盡心愛敬。以事明智。寧有福乎。李曰。智者法聖以行其仁。樂開愚朦。成人之智。治國則以惠施為善。修道則以導人為正。國家急難則能分解。進退知時無所怨尤。恩廣施大不望其報。事之得福終身無患。王其勿疑。治政之法。不可失道。勸民學善。益國最厚。王曰。誰能留李。我心愁慘。忽忽如狂。垂泣向李懺悔解過。李曰。如人不能泐。不當入深水。欲報仇者。不當豫燒。親厚中諍。後更相謝。雖知和解。善不如本無諍也。善不能賞。反聽讒言。我如飛鳥。止無常處。道貴清虛。不宜人間如野火行。傍樹為焦。激水破船。毒虫害人。與智從事。不當擾也。草木殊性。鳥獸類分。白鶴自白。鸛鵒自黑。我與彼異。無欲於世。如田家翁生習山藪。與之好衣為無益也。天下有樹。其名反戾。主自種之。不得食實。他人竊取果則為出。今王如是。善安國者而見驅逐。佞偽敗政反留食祿。賓客久留。主人厭之。我宜退矣。

王曰。人命至重願垂憶念。今欲自力事李勝前。李曰。王雖言之。猶不得施夫人意惡。我不宜留。天下家家。皆有炊食。沙門所以持鉢乞者自樂除貪。全戒無為。遠罪咎也。王曰。今李既去。莫便斷絕。願時一來。使我不恨。李曰。如俱健者。猶復相見。且欲入山。以修其志。夫近而相念惡。不如遠而相念善。智者以譬喻自解。請說一事。譬如有人以蜜塗刀。狗得舐之。以傷其舌。坐貪小甜。不知瘡痛。四臣如是。但美其口。心如利刀。王甚戒之。自今以後若有驚恐。常念李者。眾畏必除。李復言曰。鷄梟樂塚。群鼠糞居百鳥栖樹。鶴處污池。物各有性。志欲不同。我好無為。如王樂國。器雖龜弊。不可便棄各有所貯。愚賤不肖。亦不可棄。各有所用。王當識此。我猶知人言意所趣。如鳥集樹先後下枝。間關趣上。見寶祇伏。以知中外有謀。意欲厭故更受新也。李曰請退。即起出城。王與夫人。啼泣送之。人民大小。莫不號怨。王行具問李。誰可信者。李曰。我姊子賢善。可與諮議。時時共出。巡行國中。觀民謠俗可知消息。王曰受教。即與傍臣人民。為李作禮。於是別去李去之後。四臣縱橫於外。以佞辯為政。夫人於內。以妖蠱事王。王意迷惑。不復憂國。奢淫好樂。晝夜耽荒。眾官群寮。發調受取。無有道理。正平市買。不復雇直。強者陵弱。轉相抄奪。至相殺傷。不畏法禁。良民之子。掠為奴婢。六親相失。迸竄苟活。災異相屬。王不能知。風雨不時。所種不收。國虛民窮。飢餓滿道。歌詠怨聲。感動鬼神。人民愁怖。亡去略盡。號泣而行莫不思李。李如鷦鷹。臨眾鳥上。壓伏奸人。慈育民物。如天帝釋

李姊子道人。後適他郡。見國荒亂。聚落毀壞。人民單索。還為王說。大臣不政。放縱劫盜。掠殺無辜。殘虐無道。人怨神怒。天屢降災。遠近皆知。而王不覺。今不早圖。且無復民。王乃驚曰。果如李戒。我所任者。如狼在羊中。知民當散。如犇車逸馬。道人既告。何以教之。道人曰。李去國亂。皆由奸臣。王宜更計。國尚可復。願一循行。目見耳聞。當知其實。王即與道人私出。案行國界。見數十童女。年皆五六十。衣服弊壞。呼嗟而行。道人問曰。諸女年大。何以不嫁。答曰。當使王家窮困。如我快也。道人曰。汝言非也。王者位尊。何能憂汝。女曰不然。王治不政。使國飢荒。夜則困於盜賊。晝則窮於胥吏。衣食不供。誰當嫁娶我也。王復前行。見諸老母。衣不蓋形。身羸目瞑啼哭而行。道人問曰。皆有何憂。答曰。當使國王窮盲。如我快耶。道人曰。是言非也。老自目瞑。王有何過。諸母曰。我夜為盜所劫。晝為吏所奪。窮行採薪。觸犯毒螫。使我如此。非王惡耶。王復前行。見一女人跪搗牛乳。為牛所踏。蹙地罵曰。當踏王婦。如我快也。道人問曰。牛自踏汝。王家何過。答曰。王治不政。使國荒亂。盜賊不禁。令我善牛見奪。為弊牛所踏。非王惡耶。道人言。汝自無德不能搗牛。女曰。不然。若王家善。李自當留。國不亂也。王復前行。見烏啄蝦蟇。蝦蟇罵曰。當使惡王見噉。如我快也。道人曰。汝自為烏所噉。王當護汝耶。答曰。不望護也。王無恩澤。政治不平。祭祀廢絕。天旱水竭。故使我身烏見噉耳。蝦蟇喚曰。知為政者。棄一惡人。以成一家。棄一惡家。以成一鄉。不知政者



。民物失所。天下怨訟。道人曰。百姓無罪。呼嗟感天。神使蝦蟇降語如此。王自具見。宜退惡人。改往修來。與民更始。如種善地。雨澤以時何憂不熟。王曰。今當任誰。道人言宜急請李。李仁聖知時。反國必安。王還即遣使者。入山請李言。若李不還者。當向叩頭道。我自知怨負萬民。憂不能食。須待李到。李素慈仁。憂念十方。知我國荒。想必來也。使者受命。往到李所。稽首白言。大王慇懃致敬無量。自知罪過深重。違失聖意。使國荒亂。百姓窮困。涕泣思李。不能飲食。願垂愍念。一來相見也。李哀人民故。隨使者還。道見死獼猴。故剝取其皮。欲以生語。國人聞李來。皆出界迎。李到城外。止故精舍。王出相見。作禮問訊畢一面坐。叉手謝李言。空頑不及虐負萬民。請自悔勵幸遂原之。李曰甚善。四臣過耳語。李曰。卿等無過。何不公談。四臣悲曰。凡為沙門。欲望天福。人皆稱善。不當殺獼猴取其皮也。李曰。卿等自迷惑。不別真偽耳。是非好惡。天悉知之。苦樂有本。不可強力。為惡罪追。雖久不解。作善福隨。終不敗亡。禍福在己。愚謂之遠。以我剝皮。而殺獼猴。難此似是。卿曹默默。為奸不止相教事耶。言命在天。謂善無益。為惡無殃禍福之報。自然如響。響應隨聲。非從天墮。卿等作惡。豈不自識。雖欲誣之自然不聽。此非諫我。為自中耳。卿一人言。人死神滅。不復生者。是聖語耶。從意出乎。自欲為惡。反言作善無福。為惡無殃。夫天之明象。日月星辰。列現於上。誰為之者。四臣默然。李復曰。天地之間。一由罪福。人作善惡。如影隨形。死者棄身。其行不亡。譬如種穀。種敗於下。根生莖葉。實出於上。作行不斷。譬如燈燭展轉然之。故炷雖消火續不滅。行有罪福。如人夜書火滅字存。魂神隨行。轉生不斷。卿曹意志。自以為高。如人殺親可無罪乎。四臣答言。夫蔭其枝者不摘其葉。何況殺親而當無罪。李曰。然卿難我似是。吾取死皮。而尚訊之。卿曹所為法當云何。卿一人言。人死神滅不復生。一人言。苦樂在天。一人言。作善無福。為惡無殃。一人自怙。知占星宿。外陽為善。內陰為奸。譬如偽金其中純銅。貌飾美辭。心行讒賊。如狼在羊中。主不能覺天下惡人。亦稱為道。被髮臥地。道說經戒。專行諂欺。貪利欲。得愚人信伏。如雨掩塵。群妖相厭。如水流溢。不時入海。多所傷敗。惟有聖人。能濟天下。化惡授善。莫不蒙祐。若善無福。惡無殃者。古聖何故。造制經典。授王利劍。夫行有報。其法自然。善者受福。惡者受殃。天之所疾。禍無久遲。陰德雖隱。後無不障。故國立王。王政法天。任賢使能。賞善伐奸。各隨其行。如響應聲。人死神去。隨行往生。如車輪轉。不得離地。信哉罪福。不可誣也。人行至誠。鬼神助之。惡雖不覺。終必受殃。故當戒慎。遠惡知慚。若皆為善。稟氣當同。不善者多。或有不平。或壽不壽。多病少病。醜陋端正。貧富貴賤。賢愚不均。至有盲聾瘡痍跛蹇隆殘。百病皆由宿命行惡所致。其受百福。人所樂者。則是故世行善使然。積德忠政。故有日月星辰。有天有人。帝王豪貴。是明證也。何可言無。宜熟思之。勿謂不然。李說是時。王與臣民。無不解悅。李復曰。古昔有王。名為狗獵。池中生甜魚。甘而少骨。王使一人監護。令日獻八魚。其監亦日竊食八魚。王覺魚減。更立八監。使共守護。八監。又各日

竊八魚。守之者多。魚為之盡。今王如是。所任不少。為亂益甚。譬如人摘生果既亡其種食之無味。王欲為治。不用賢人。既失其民。後又無福。治國不正。則使天下有誾奪之心。如人治產。不勤用心。則財日耗。國有勇武習戰陣者。不足其意則弱其國。為王不敬道德。不事高明。生則賢者不歸。死則神不生天。掠殺無辜。使天下怨訟。則天降災。身失令名。治國以法。為政得忠。敬長愛少。孝順奉善。現世安吉。死得生天譬如牛行其道直正餘牛皆從。尊貴有道。率下以正。遠近伏化。則致太平。為君當明探古達今。動靜知時。剛柔得理。惠下利民。有施平均。如是則世世豪貴。後可得泥洹之道。眾坐皆喜。稱善無量。王即避坐。稽首白言。今幸所語。譬如疾風吹却雲雨。幸卒慈念。垂化如前。幸即起行。隨王入宮。四臣愚癡。於是見廢。幸復治國。恩潤滂流。風雨時節。五穀豐熟。人民歡喜。四方雲集。上下和樂。遂致太平。佛言。時幸者。今我身是也。姊子道人。則阿難是。時王藍達。今卑先匿是。時夫人。則好首是。時犬寶祇者。車匿是。時四大臣。則今四道人殺好首者。是時語蝦蟇者。今得羅漢漚陀耶是。我為菩薩。世世行善。勤苦積德。無央數劫。為萬民故。今自致得佛。所願皆得。諸值我時聞經法者。宜各精進為善勿懈。佛說是已。有三億人。得踐道迹。皆受五戒。歡喜奉行